

摘藻堂四庫全書薈要

史部

欽定四庫全書薈要卷四千二百五十九

史部

宋書卷九十七

梁

沈

約

撰

列傳第五十七

夷蠻

南夷西南夷大抵在交州之南及西南居大海中洲上
相去或三千里遠者二三萬里乘舶舉帆道里不可
詳知外國諸夷雖言里數非定實也

南夷林邑國高祖永初二年林邑王范陽邁遣使貢獻
即加除授太祖元嘉初侵暴日南九德諸郡交州刺史
杜弘文建牙聚衆欲討之聞有代乃止七年陽邁遣使
自陳與交州不睦求蒙恕宥八年又遣樓船百餘寇九
德入四會浦口交州刺史阮彌之遣隊主相道生三千
人赴討攻區粟城不剋引還林邑欲伐交州借兵於扶
南王扶南不從十年陽邁遣使上表獻方物求領交州
詔答以道遠不許十二十五十六十八年頻遣貢獻而

寇盜不已所貢亦陋薄太祖忿其違傲二十三年使龍
驤將軍交州刺史檀和之伐之遣太尉府振武將軍宗
慤受和之節度和之遣府司馬蕭景憲為前鋒慤仍領
景憲軍副陽邁聞將見討遣使上表求還所畧日南民
戶奉獻國珍太祖詔和之陽邁果有款誠許其歸順其
年二月軍至朱梧戍遣府戶曹參軍日南太守姜仲基
前部賊曹參軍蟠弘民隨傳詔畢願高精奴等宣揚恩
旨陽邁執仲基精奴等二十八人遣弘民反命外言歸

款猜防愈嚴景憲等乃進軍向區粟城陽邁遣大帥范扶龍大成區粟又遣水步軍徑至景憲破其外救盡銳攻城五月尅之斬扶龍大首獲金銀雜物不可勝計乘勝追討即尅林邑陽邁父子並挺身奔逃所獲珍異皆是未名之寶上嘉將帥之功詔曰林邑介恃遐險久稽王誅龍驤將軍交州刺史檀和之忠果到列思畧經濟稟命致討萬里推鋒法命肅齊文武畢力潔己奉公以身率下故能立勲海外震服殊俗宜加褒飾參管近侍

可黃門侍郎領越騎校尉行建武將軍龍驤司馬蕭景
憲協贊軍首勤捷顯著總勒前驅尅殄巢穴必能威服
荒夷撫懷民庶可持節督交州廣州之鬱林寧浦二郡
諸軍事建威將軍交州刺史龍驤司馬童林之九真太
守傅蔚祖戰死並贈給事中世祖孝建二年林邑又遣
長史范龍跋奉使貢獻除龍跋揚武將軍大明二年林
邑王范神成又遣長史范流奉表獻金銀器及香布諸
物太宗泰豫元年又遣使獻方物初檀和之被徵至豫

章值豫章民胡誕世等反因討平之并論林邑功封雲
杜縣子食邑四百戶和之高平金鄉人檀憑子也太祖
元嘉二十七年自太子左衛率為世祖鎮軍司馬輔國
將軍彭城太守元凶弑立以為西中郎將雍州刺史世
祖入討加輔國將軍統豫州戍事因出南奔世祖即位
以為右衛將軍孝建二年除輔國將軍豫州刺史不行
復為右衛加散騎常侍三年出為南兗州刺史坐酣飲
黷貨迎獄中女子入內免官禁錮其年卒追贈左將軍

謚曰襄子廣州諸山並徧獠種類繁熾前後屢為侵暴
歷世患苦之世祖大明中合浦大帥陳檀歸順拜龍驤
將軍四年檀表乞官軍征討未附乃以檀為高興太守
將軍如故遣前朱提太守費沈龍驤將軍武期率衆南
伐并通朱崖道並無功輒殺檀而反沈下獄死

扶南國太祖元嘉十一十二年國王持黎跋摩遣
使奉獻

西南夷訶羅陀國元嘉七年遣使奉表曰伏承聖主信

重三寶興立塔寺周滿國界城郭莊嚴清淨無穢四衢
交通廣博平坦臺殿羅列狀若衆山莊嚴微妙猶如天
宮聖王出時四兵具足導從無數以為守衛都人士女
麗服光飾市廛豐富珍賄無量王法清整無相侵奪學
徒遊集三乘競進敷演正法雲布雨潤四海流通萬國
交會長江眇漫清淨深廣有生咸資莫能銷穢陰陽調
和災厲不行誰有斯美大宋揚都聖王無倫臨覆上國
有大慈悲子育萬物平等忍辱怨親無二濟乏周窮無

所藏積靡不照達如日之明無不受樂猶如淨月宰輔
賢良羣臣貞潔盡忠奉主心無異想伏惟皇帝是我真
主臣是訶羅陀國王名曰堅鎧今敬稽首聖王足下惟
願大王知我此心久矣非適今也山海阻遠無緣自達
今故遣使表此丹誠所遣二人一名毗紐一名婆田令
到天子足下堅鎧微蔑誰能知者是故今遣二人表此
微心此情既果雖死猶生仰惟大國藩守曠遠我即邊
方藩守之一上國臣民普蒙慈澤願垂恩逮等彼僕臣

臣國先時人衆殷盛不為諸國所見陵迫今轉衰弱鄰國競侵伏願聖王遠垂覆護并市易往反不為禁閉若見哀念願時遣還令此諸國不見輕侮亦令大王名聲普聞扶危救弱正是今日今遣二人是臣同心有所宣啓誠實可信願勅廣州時遣舶還不令所在有所陵奪願自今以後賜年年奉使今奉微物願垂哀納

呵羅單國治闍婆洲元嘉七年遣使獻金剛指鐶赤鸚鵡鳥天竺國白疊古貝葉波國古貝等物十年呵羅單

國王毗沙跋摩奉表曰常勝天子陛下諸佛世尊常樂
安隱三達六通為世間道是名如來應供正覺遺形舍
利造諸塔像莊嚴國土如須彌山村邑聚落次第羅匝
城廓館宇如忉利天宮宮殿高廣樓閣莊嚴四兵具足
能伏怨敵國土豐樂無諸患難奉承先王正法治化人
民良善慶無不利處雪山陰雪水流注百川洋溢八味
清淨周匝屈曲順趣大海一切衆生咸得受用於諸國
土殊勝第一是名震旦大宋揚都承嗣常勝大王之業

德合天心仁蔭四海聖智周備化無不順雖人是天護
世降生功德寶藏大悲救世為我尊主常勝天子是故
至誠五體敬禮呵羅單國王毗沙跋摩稽首問訊其後
為子所篡奪十三年又上表曰大吉天子足下離淫怒
癡哀愍羣生想好具足天龍神等恭敬供養世尊威德
身光明照如水中月如日初闕間自蒙普照十方其白
如雪亦如月光清淨如華顏色照耀威儀殊勝諸天龍
神之所恭敬以正法寶梵行衆僧莊嚴國土人民熾盛

安隱快樂城閤高峻如乾他山衆多勇士守護此城樓
閤莊嚴道巷平正著種種衣猶如天服於一切國為最
殊勝吉揚州城無憂天主愍念羣生安樂民人律儀清
淨慈心深廣正法治化共養三寶名稱遠至一切並聞
民人樂見如月初生譬如梵王世界之主一切人天恭
敬作禮呵羅單跋摩以頂禮足猶如現前以體布地如
殿陛道供養恭敬如奉世尊以頂著地曲躬問訊忝承
先業嘉慶無量忽為惡子所見爭奪遂失本國今唯一

心歸誠天子以自存命今遣毗紉問訊大家意欲自往
歸誠宣訴復畏大海風波不達今命得存亦由毗紉此
人忠志其恩難報此是大家國今為惡子所奪而見驅
擯意頗忿惋規欲雪復伏願大家聽毗紉買諸鎧仗袍
襖及馬願為料理毗紉使得時還前遣閼邪仙婆羅訶
蒙大家厚賜悉惡子奪去啓大家使知今奉薄獻願垂
納受此後又遣使二十六年太祖詔曰訶羅單婆皇嬰
達三國頻越遐海款化納貢遠誠宜甄可竝加除授乃

遣使策命之曰惟汝慕義款化效誠荒遐恩之所洽殊
遠必甄用敷典章顯茲策授爾其欽奉凝命永固厥職
可不慎歟二十九年又遣長史嬰和沙彌獻方物

嬰皇國元嘉二十六年國王舍利嬰羅跋摩遣使獻方
物四十一種太祖策命之為嬰皇國王曰惟爾仰政邊
城率貢來庭皇澤凱被無幽不治宜班典策授茲嘉命
爾其祇順禮度式保厥終可不慎歟二十八年復貢獻
世祖孝建三年又遣長史竺那嬰智奉表獻方物以那

嬰智為振威將軍大明三年獻赤白鸚鵡大明八年太宗泰始二年又遣使貢獻太宗以其長史竺須羅達前長史振威將軍竺那嬰智竝為龍驤將軍

嬰達國元嘉二十六年國王舍利不陵伽跋摩遣使獻方物太祖策命之為嬰達國王曰惟爾仰化懷誠馳慕聲教皇風遐暨荒服來款是用加茲顯策式甄義順爾其祇順憲典永終休福可不慎歟二十六年二十八年復遣使獻方物

闍婆婆達國元嘉十二年國王師黎婆達陀阿羅跋摩
遣使奉表曰宗國大主大吉天子足下敬禮一切種智
安隱天人師降伏四魔成等正覺轉尊法輪度脫衆生
教化已周入於涅槃舍利流布起无量塔衆寶莊嚴如
須彌山經法流布如日照明無量淨僧猶如列宿國界
廣大民人衆多宮殿城郭如忉利天宮名大宗揚州大
國大吉天子安處其中紹繼先聖王有四海閭浮提內
莫不來服悉以茲水普飲一切我雖在遠亦霑靈潤是

以雖隔巨海常遙臣屬願照至誠垂哀納受若蒙聽許
當年遣信若有所須惟命是獻伏願信受不生異想今
遣使主佛大阇婆副使葛抵奉宣微誠稽首敬禮大吉
天子足下阇婆所啓願見信受諸有所請唯願賜聽今
奉微物以表微心

師子國元嘉五年國王刹利摩訶南奉表曰謹白太宗
明主雖山海殊隔而音信時通伏承皇帝道德高遠覆
載同於天地明照齊乎日月四海之外無往不伏方國

諸王莫不遣信奉獻以表歸德之誠或泛海三年陸行
十日畏威懷德無遠不至我先王以來唯以修德為正
不嚴而治奉事三寶道濟天下欣人為善慶若在己欲
與天子共弘正法以度難化故託四道人遣二白衣送
牙臺像以為信誓信還願垂音告至十二年又復遣使
奉獻

天竺迦毗黎國元嘉五年國王月愛遣使奉表曰伏聞
彼國據江傍海山川周固衆妙悉備莊嚴清淨猶如化

城宮殿莊嚴街巷平坦人民充滿歡娛安樂聖王出遊
四海隨從聖明仁愛不害衆生萬邦歸仰國富如海國
中衆生奉順正法大王仁聖化之以道慈施羣生無所
遺惜帝修淨戒軌道不及無上法船濟諸沈溺羣寮百
官受樂無怨諸天擁護萬神侍衛天魔降伏莫不歸化
王身莊嚴如日初出仁澤普潤猶如大雲聖賢承業如
日月天於彼真丹最為殊勝臣之所住名迦毗河東際
于海其城四邊悉紫紺石首羅天護令國安隱國王相

承未嘗斷絕國中人民率皆修善諸國來集共遵道法

諸寺舍中皆七寶形像衆妙供具如先王法臣自修檢
不犯道禁臣名月愛棄世王種惟願大王聖體和善羣
臣百官悉自安隱今以此國羣臣吏民山川珍寶一切
歸屬五體歸誠大王足下山海遐隔無由朝覲宗仰之
至遣使下承使主父名天魔悉達使主名尼陀達此人
由來良善忠信是故今遣奉使表誠大王若有所須珍
奇異物悉當奉送此之境土便是王國王之法令治國

善道悉當承用願二國信使往來不絕此反使還願賜
一使具宣聖命備勅所宜款至之誠望不空反所白如
是願加哀愍奉獻金剛指鐶摩勒金環諸寶物赤白鸚
鵡各一頭太宗泰始二年又遣使貢獻以其使主竺扶
大竺阿彌並為建威將軍元嘉十八年蕪摩黎國王那
隣那羅跋摩遣使獻方物世祖孝建二年斤陀利國王
釋婆羅那隣陀遣長史竺留陀及多獻金銀寶器後廢
帝元徽元年婆黎國遣使貢獻凡此諸國皆事佛道佛

道自後漢明帝法始東流自此以來其教稍廣自帝王
至於民庶莫不歸心經誥充積訓義深遠別為一家之
學焉元嘉十二年丹陽尹蕭摩之奏曰佛化被于中國
已歷四代形像塔寺所在千數進可以擊心退足以招
勸而自頃以來情敬浮末不以精誠為至更以奢競為
重舊宇頽弛曾莫之修而各務造新以相誇尚甲第顯
宅於茲始盡材竹銅綵糜損無極無闕神祇有累人事
建中越制宜加裁檢不為之防流道未息請自今以後

有欲鑄銅像者悉詣臺自聞興造塔寺精舍皆先詣在所二千石通辭郡依事列言本州須許報然後就功其有輒造寺舍者皆依不承用詔書律銅宅林苑悉沒入官詔可又沙汰沙門罷道者數百人世祖大明二年有曇標道人與羌人高閼謀反上因是下詔曰佛法訛替沙門混雜未足扶濟鴻教而專成逋藪加姦心頻發凶狀屢聞敗亂風俗人神交怨可付所在精加沙汰後有違犯嚴加誅坐於是設諸條禁自非戒行精苦並使還

俗而諸寺尼出入宮掖交關妃后此制竟不能行先是
晉世庾冰始創議欲使沙門敬王者後桓玄復述其義
並不果行大明六年世祖使有司奏曰臣聞邃宇崇居
非期宏峻拳跪槃伏非止敬恭將以施張四維締制入
寓故雖儒法枝派名墨條分至於崇親嚴上厥繇靡爽
唯浮圖為教遏自龍堆反經提傳訓遐事遠練生瑩識
恒俗稱難宗旨緬謝微言淪隔拘文蔽道在末彌扇遂
乃陵越典度偃倨尊戚失隨方之眇迹迷製化之淵義

夫佛法以謙儉自牧忠虔為道不輕比丘遭道人斯拜
目連桑門過長則禮寧有屈膝四輩而簡體二親稽顙
耆臘而直體萬乘者哉故咸康創議元興載述而事屈
偏黨道挫餘分今鴻源遙洗羣流仰鏡九仙盡寶百神
聳職而畿輦之內舍弗臣之氓陛席之間延抗禮之客
懼非所以澄一風範詳示景則者也臣等參議以為沙
門接見比當盡虔禮敬之容依其本俗則朝徽有序乘
方兼遂矣詔可前廢帝初復舊世祖寵姬殷貴妃薨為

之立寺貴妃子子鸞封新安王故以新安為寺號前廢
帝殺子鸞乃毀廢新安寺驅斥僧徒尋又毀中興天寶
諸寺太宗定亂下令曰先帝建中興及新安諸寺所以
長世垂範弘宣盛化頃遇昏虐法像殘毀師徒奔迸甚
以矜懷妙訓淵謨有扶名教可招集舊僧普各還本並
使材官隨宜修復宗世名僧有道生道生彭城人也父
為廣武令生出家為沙門法大弟子幼而聰悟年十五
便能講經及長有異解立頓悟義時人推服之元嘉十

一年卒於廬山沙門慧琳為之誄慧琳者秦郡秦縣人
姓劉氏少出家住冶城寺有才章兼外內之學為廬陵
王義真所知嘗著均善論其詞曰有白學先生以為中
國聖人經綸百世其德弘矣智周萬變天人之理盡矣
道無隱旨教罔遺筌聰叡迪哲何負於殊論哉有黑學
道士陋之謂不照幽冥之途弗及來生之化雖尚虛心
未能虛事不逮西域之深也於是白學訪其所以不逮
云余白曰釋氏所論之空與老氏所言之空無同異乎

黑曰異釋氏即物為空空物為一老氏有無兩行空有為異安得同乎白曰釋氏空物物信空邪黑曰然空又空不趨於空矣白曰三儀靈長於宇宙萬品盈生於天地孰是空哉黑曰空其自性之有不害因假之體也今構羣材以成大厦罔專寢之實積一毫以致合抱無檀木之體有生莫俄頃之留太山茂累息之固興滅無常因緣無主所空在於性理所難據於事用吾以為悞矣白曰所言實相空者其如是乎黑曰然白曰浮變之理

交於目前視聽者之所同了邪解之以登道場重之以輕異學誠未見其淵深黑曰斯理若近求之實遠夫情之所重者虛事之可重者實今虛其真實離其浮偽愛欲之惑不得不去愛去而道場不登者吾不知所以相晚也白曰今析豪空樹無缺乘廕之茂離材虛室不損輪奐之美明無常增其悵蔭之情陳若徧篤其競辰之慮貝錦以繁采發輝和羹以鹽梅致旨齊侯追爽鳩之樂燕王無延年之術恐和合之辯危脆之教正足戀其

嗜好之欲無以傾其愛競之感也黑曰斯固理絕於諸
華墳素莫之及也白曰山高累卑之辭川樹積小之詠
舟壑火傳之談堅白唐肆之論蓋盈於中國矣非理之
與故不舉以為教本耳子固以遺情遺累虛心為道而
據事剖析者更由指掌之間乎黑曰周孔為教正及一
世不見來生無窮之緣積善不過子孫之慶累惡不過
餘殃之罰報効止於榮祿誅責極於窮賤視聽之外冥
然不知良可悲矣釋迦闕無窮之業拔重關之險陶方

寸之慮宇宙不足盈其明設一慈之救羣生不足勝其
化叙地獄則民懼其罪敷天堂則物歡其福指泥洹以
長歸乘法身以遐覽神變無不周靈澤靡不覃先覺翻
翔於上世後悟騰翥而不紹坎井之局何以識大方之
家乎白曰固能大其言矣今効神光無徑寸之明驗靈
變罔纖介之異勤誠者不覩善救之貌篤學者弗克陵
虛之實徒稱無量之壽孰見期頤之叟咨嗟金剛之固
安覲不朽之質苟於事不符宜尋立言之指遺其所寄

之說也且要天堂以就善曷若服義而蹈道懼地獄以
救身孰與從理以端心禮拜以求免罪不由祇肅之意
施一以徼百倍弗乘無恠之情美泥洹之樂生耽逸之
慮贊法身之妙肇好奇之心近欲未弭遠利又興雖言
菩薩無欲羣生固以有欲矣甫救交敝之氓永開利競
之俗澄神反道其可得乎黑曰不然若不示以來生之
欲何以權其當生之滯物情不能頓至故積漸以誘之
奪此俄頃要彼無窮若弗勤春稼秋穡何期端坐井底

而息意庶慮者長淪於九泉之下矣白曰異哉何所務之乖也道在無欲而以有欲要之北行求郢西征索越方長迷於幽都永謬滯於昧谷遼遼閩楚其可見乎所謂積漸者日損之謂也當先遺其所輕然後忘其所重使利欲日去淳白自生耳豈得以少要多以麤易妙俯仰之間非利不動利之所蕩其有極哉乃丹青眩媚綵之目土木夸好壯之心興縻廢之道單九服之財樹無用之事割羣生之急致營造之計成私樹之權務權化

之業結師黨之勢苦節以要厲精之譽護法以展陵競
之情悲矣夫道其安寄乎是以周孔敦俗弗闕視聽之
外老莊陶風謹守性分而已黑曰三遊本於仁義盜跖
資於五善聖跡之敝豈有內外且黃老之家符章之偽
水祝之誣不可勝論子安於彼駭於此玩於濁水違於
清淵耳白曰有跡不能不敝有術不能無偽此乃聖人
所以桎梏也今所惜在作法於貪遂以成俗不正其敝
反以為高耳至若淫妄之徒世自近鄙源流蔑然因不

足論黑曰釋氏之教專救夷俗便無取於諸華邪白曰
曷為其然為則開端宜懷屬緒愛物去殺尚施周人息
心遺榮華之願大士布兼濟之念仁義玄一者何以尚
之惜乎幽旨不亮末流為累耳黑曰子之論善殆同矣
便事盡於生乎白曰幽冥之理固不極於人事矣周孔
疑而不辨釋迦辨而不實將宜廢其顯晦之跡存其所
要之旨請嘗言之夫道之以仁義者服理以從化帥之
以勸戒者循利而遷善故甘辭興於有欲而滅於悟理

淡說行於天解而息於貪僞是以示來生者蔽虧於道
釋不得已杜幽闇者冥符於姬孔閉其兌由斯論之言
之者未必遠知之者未必得不知者未必失但知六度
與五教並行信順與慈悲齊立耳殊塗而同歸者不得
守其發輪之轍也論行於世舊僧謂其貶黜釋氏欲加
擯斥太祖見論賞之元嘉中遂參權要朝廷大事皆與
議焉賓客輻湊門車常有數十兩四方贈賂相係勢傾
一時注孝經及莊子逍遙篇文論傳於世又有慧嚴慧

議道人並住東安寺學行精整為道俗所推時闕場寺
多禪僧京師為之語曰闕場禪師窟東安談義林世祖
大明四年於中興寺設齋有一異僧衆莫之識問其名
答言名明慧從天安寺來忽然不見天下無此寺名乃
改中興曰天安寺大明中外國沙門摩訶衍苦節有精
理於京都多出新經勝鬘經尤見重內學

東夷高句驪國今治漢之遼東郡高句驪王高璉晉安
帝義熙九年遣長史高翼奉表獻赭白馬以璉為使持

節都督營州諸軍事征東將軍高句驪王樂浪公高祖
踐阼詔曰使持節都督營州諸軍事征東將軍高句驪
王樂浪公璉使持節督百濟諸軍事鎮東將軍百濟王
映並執義海外遠修貢職惟新告始宜荷國休璉可征
東大將軍映可鎮東大將軍持節都督王公如故三年
加璉散騎常侍增督平州諸軍事少帝景平二年璉遣
長史馬婁等詣闕獻方物遣使慰勞之曰皇帝問使持
節散騎常侍都督營平二州諸軍事征東大將軍高句

驪王樂浪公纂戎東服庸績繼軌厥惠既彰款誠亦著
踰遼越海納貢本朝朕以不德忝承鴻緒永懷先蹤思
覃遺澤今遣謁者朱邵伯副謁者王邵子等宣旨慰勞
其茂康惠政永隆厥功式昭往命稱朕意焉先是鮮卑
慕容寶治中山為索虜所破東走黃龍義熙初寶弟熙
為其下馮跋所殺跋自立為主自號燕王以其治黃龍
城故謂之黃龍國跋死子弘立屢為索虜所攻不能下
太祖世每歲遣使獻方物元嘉十二年賜加除授十五

年復為索虜所攻弘敗走奔高驪北豐城表求迎接太祖遣使王白駒趙次興迎之并令高驪料理資遣璉不欲使弘南乃遣將孫漱高仇等襲殺之白駒等率所領七千餘人掩討漱等生禽漱殺高仇等二人璉以白駒等專殺遣使執送之上以遠國不欲違其意白駒等下獄見原璉每歲遣使十六年太祖欲北討詔璉送馬璉獻馬八百匹世祖孝建二年璉遣長史董騰奉表慰國哀再周并獻方物大明三年又獻肅慎氏楛矢石砮七

年詔曰使持節散騎常侍督平營二州諸軍事征東大將軍高句驪王樂浪公璉世事忠義作藩海外誠係本朝志剪殘險通譯沙表克宣王猷宜加褒進以旌純節可車騎大將軍開府儀同三司持節常侍都督王公如故太宗泰始後廢帝元徽中貢獻不絕

百濟國本與高驪俱在遼東之東千餘里其後高驪畧有遼東百濟畧有遼西百濟所治謂之晉平郡晉平縣義熙十二年以百濟王餘映為使持節都督百濟諸軍

事鎮東將軍百濟王高祖踐祚進號鎮東大將軍少帝
景平二年映遣長史張威詣闕貢獻元嘉二年太祖詔
之曰皇帝問使持節都督百濟諸軍事鎮東大將軍百
濟王累葉忠順越海効誠遠王纂戎聿修先業慕義既
彰厥懷亦款浮桴驪水獻暎執贄故嗣位方任以藩東
服勉勗所莅無墜前蹤今遣兼謁者閭丘恩子兼副謁
者丁敬子等宣旨慰勞稱朕意其後每歲遣使奉表獻
方物七年百濟王餘毗復修貢職以映爵號授之二十

七年毗上書獻方物私假臺使馮野夫西河太守表求
易林式占腰弩太祖竝與之毗死子慶代立世祖大明
元年遣使求除授詔許二年慶遣使上表曰臣國累葉
偏受殊恩文武良輔世蒙朝爵行冠軍將軍右賢王餘
紀等十一人忠勤宜在顯進伏願垂愍並聽賜除仍以
行冠軍將軍右賢王餘紀為冠軍將軍以行征虜將軍
左賢王餘昆行征虜將軍餘暈竝為征虜將軍以行輔
國將軍餘都餘乂並為輔國將軍以行龍驤將軍沐衿

餘爵並為龍驤將軍以行寧朔將軍餘流糜貴竝為寧朔將軍以行建武將軍于西餘婁竝為建武將軍太宗泰始七年又遣使貢獻

倭國在高驪東南大海中世修貢職高祖永初二年詔曰倭讚萬里修貢遠誠宜甄可賜除授太祖元嘉二年讚又遣司馬曹達奉表獻方物讚死弟珍立遣使貢獻自稱使持節都督倭百濟新羅任那秦韓慕韓六國諸軍事安東大將軍倭國王表求除正詔除安東將軍倭

國王珍又求除正倭隋等十三人平西征虜冠軍輔國將軍號詔竝聽二十年倭國王濟遣使奉獻復以為安東將軍倭國王二十八年加使持節都督倭新羅任那加羅秦韓慕韓六國諸軍事安東將軍如故并除所上二十三人軍郡濟死世子興遣使貢獻世祖大明六年詔曰倭王世子興奕世載忠作藩外海稟化寧境恭修貢職新嗣邊業宜授爵號可安東將軍倭國王興死弟武立自稱使持節都督倭百濟新羅任那加羅秦韓慕

韓七國諸軍事安東大將軍倭國王順帝昇明二年遣使上表曰封國偏遠作藩于外自昔祖禰躬擐甲冑跋涉山川不遑寧處東征毛人五十五國西服衆夷六十六國渡平海北九十五國王道融泰廓土遐畿累葉朝宗不愆于歲臣雖下愚忝膺先緒驅率所統歸崇天極道逕百濟裝治船舫而句驪無道圖欲見吞掠抄邊隸虔劉不已每致稽滯以失良風雖曰進路或通或不臣亡考濟實忿寇讎壅塞天路控弦百萬義聲感激方欲

大舉奄喪父兄使垂成之功不獲一簣居在諒闇不動
兵甲是以偃息未捷至今欲練甲治兵申父兄之志義
士虎賁文武効功白刃交前亦所不顧若以帝德覆載
推此彊敵克靖方難無替前功竊自假開府儀同三司
其餘咸假授以勸忠節詔除武使持節都督倭新羅任
那加羅秦韓慕韓六國諸軍事安東大將軍倭王

荊雍州蠻槃瓠之後也分建種落布在諸郡縣荊州置
南蠻雍州置寧蠻校尉以領之世祖初罷南蠻併大府

而寧蠻如故蠻民順附者一戶輸穀數斛其餘無雜調而宋民賦役嚴苦貧者不復堪命多逃亡入蠻蠻無徭役彊者又不供官稅結黨連羣動有數百人州郡力弱則起為盜賊種類稍多戶口不可知也所在多深險居武陵者有雄谿楠谿辰谿酉谿舞谿謂之五谿蠻而宜都天門巴東建平江北諸郡蠻所居皆深山重阻人跡罕至焉前世以來屢為民患少帝景平二年宜都蠻帥石寧等一百二十三人詣闕上獻太祖元嘉六年建

平蠻張雖之等五十人七年宜都蠻田生等一百一十三人竝詣闕獻見其後沔中蠻大動行旅殆絕天門淩中令宗僑之徭賦過重蠻不堪命十八年蠻田向求等為寇破淩中虜畧百姓荊州刺史衡陽王義季遣行參軍曹孫念討破之獲生口五百餘人免僑之官二十四年南郡臨沮當陽蠻反縛臨沮令傅僧驥荊州刺史南譙王義宣遣中兵參軍王謏討破之先是雒州刺史劉道產善撫諸蠻前後不附官者莫不順服皆引出平土

多緣沔為居及道產亡蠻又反叛及世祖出為雒州羣
蠻斷道擊大破之臺遣軍主沈慶之連年討蠻所向皆
平殄事在慶之傳二十八年正月龍山雉水蠻寇抄涅
陽縣南陽太守朱曇韶遣軍討之失利殺傷三百餘人
曇韶又遣二千人係之蠻乃散走是歲湓水諸蠻因險
為寇雒州刺史隨王誕遣使說之曰頃威懷所被覃自
遐遠順化者寵祿逆命者無遺此亦尔所知也聖朝今
普天肆眚許以自新便宜各還舊居安堵復業改過革

心於是乎始先是蠻帥魯奴子擄龍山屢為邊患魯軌
在長社奴子歸之軌言於虜主以為四山王軌子夾歸
國奴子亦求內附隨王誕又遣軍討沔北諸蠻襲濁山
如口蜀松三柴剋之又圍升錢柏義諸柴蠻悉力距戰
軍以具裝馬夾射大破之斬首二百級獲生蠻千口牛
馬八十頭世祖大明中建平蠻向光侯寇暴峽川巴東
太守王濟荊州刺史朱修之遣軍討之光侯走清江清
江去巴東千餘里時巴東建平宜都天門四郡蠻為寇

諸郡民戶流散百不存一太宗順帝世尤甚雖遣攻伐終不能禁荊州為之虛敞大明中桂陽蠻反殺荔令晏珍之臨賀蠻反殺闕建令邢伯兒振武將軍蕭沖之討之獲少費多抵罪

豫州蠻廩君後也盤瓠及廩君事並具前史西陽有巴水蘄水希水赤亭水西歸水謂之五水蠻所在竝深岨種落熾盛歷世為盜賊北接淮汝南極江漢地方數千里元嘉二十八年西陽蠻殺南川令劉臺并其家口二

十九年新蔡蠻二千餘人破大雷戍畧公私船舫悉引入湖有亡命司馬黑石在蠻中共為寇盜太祖遣太子步兵校尉沈慶之率江荆雍豫諸州軍討之世祖大明四年又遣慶之討西陽蠻大剋獲而反司馬黑石徒黨三人其一人名智黑石號曰太公以為謀主一人名安陽號譙王一人名續之號梁王蠻文小羅等討禽續之為蠻世財所篡小羅等相率斬世財父子六人豫州刺史王玄謨遣殿中將軍郭元封慰勞諸蠻使縛送亡命

蠻乃執智黑石安陽二人送詣玄謨世祖使於壽陽斬之世宗初即位四方反叛及南賊敗於鵲尾西陽蠻田益之田義之成邪財田光興等起義攻郢州剋之以益之為輔國將軍都統四山軍人又以蠻戶立宋安光城二郡以義之為宋安太守光興為龍驤將軍光城太守封益之邊城縣王食邑四百一十一戶成邪財陽城縣王食邑三千戶益之徵為虎賁中郎將將軍如故順帝昇明初又轉射聲校尉冠軍將軍成邪財死子婆思襲

爵為輔國將軍武騎常侍晉熙蠻梅式生亦起義斬晉
熙太守閻湛之晉安王子勛典籤沈光明祖封高山侯
食所統牛崗下柴二村三十戶

史臣曰漢世西譯遐通兼途累萬跨頭痛之山越繩度
之險生行死徑身往魂歸晉氏南移河隴負隔戎夷梗
路外域天斷若夫大秦天竺迥出西溟二漢銜役特艱
斯路而商貨所資或出交部汎海陵波因風遠至又重
峻參差氏衆非一殊名詭號種別類殊山琛水寶由茲

自出通犀翠羽之珍蛇珠火布之異千名萬品並世主
之所虛心故舟舶繼路商使交屬太祖以南琛不至遠
命師旅泉浦之捷威震滄溟未名之寶入充府實夫四
夷孔熾患深自古蠻貊殊雜種衆特繁依深傍岨充積
畿甸咫尺華氓易興狡毒畧財據土歲月滋深自元嘉
將半寇慝彌廣遂盤結數州搖亂邦邑於是命將出師
恣行誅討自江漢以北廬江以南按山盪谷窮兵罄武
繫頸囚俘蓋以數百萬計至於孩年耄齒執訊所遺將

卒申好殺之憤干戈窮酸慘之用雖云積怨為報亦甚
張奐所云流血于野傷和致災斯固仁者之言矣

宋書卷九十七

宋書卷九十七考證

南夷林邑國傳交州刺史檀和之忠果到列○到列二字前魯爽傳亦有之

百濟國傳慕義既彰厥懷亦款○亦一本作赤

荆雍州蠻傳天門淩中令宗僑之徭賦過重○僑一本作矯

宋書卷九十七考證

謹案卷九十六第六頁前一行慕延率部落西奔
白蘭刊本率訛索據毛本改

卷九十七第三頁後二行高平金鄉人檀憑子也
據晉書及高祖本紀檀憑下脫之字

第三頁後四行以為西中郎將雍州刺史諸本雍
訛雅今改

第二十四頁前六行道逕百濟諸本逕訛遙據南
史改

欽定四庫全書

總校官庶吉士臣侍朝

校對官編修臣裴謙

謄錄監生臣任益春

欽定四庫全書薈要

史部
宋書卷九十八

詳校官內閣侍讀臣孫球



欽定四庫全書薈要卷四千二百六十

史部

宋書卷九十八

梁

沈

約

撰

傳第五十八

氏胡

略陽清水氏楊氏秦漢以來世居隴右為豪族漢獻帝建安中有楊騰者為部落大帥騰子駒勇健多計略始徙仇池仇池地方百頃因以百頃為號四面斗絕高平

地方二十餘里羊腸蟠道三十六回山上豐水泉煮土
成鹽駒後有名千萬者魏拜為百頃氏王千萬子孫名
飛龍漸彊盛晉武假征西將軍還居略陽無子養外甥
令狐氏子為子名戊搜晉惠帝元康六年避齊萬年之
亂率部落四千家還保百頃自號輔國將軍右賢王關
中士奔流者多依之戊搜延納撫接欲去者則衛護資
遣之愍帝以為驃騎將軍左賢王時南陽王保在上邽
又以戊搜子難敵為征南將軍建興五年戊搜卒難敵

襲位與堅頭分部曲難敵號左賢王屯下辯堅頭號右
賢王屯河池元帝太興四年劉曜伐難敵與堅頭俱奔
晉壽臣於李雄曜退復還仇池成帝咸和九年難敵卒
子毅立自號使持節龍驤將軍左賢王下辯公以堅頭
子槃爲使持節冠軍將軍右賢王河池公咸康元年遣
使稱藩於晉以毅爲征南槃征東將軍三年毅族兄初
襲殺毅并有其衆自立爲仇池公臣於石虎後遣使稱
藩於穆帝永和三年以初爲使持節征南將軍雍州刺

史平羗校尉仇池公初子國為鎮東將軍武都太守十年改封初天水公十一年殺小弟宗奴使姑子梁式玉因侍直手刃殺初子國率左右誅式玉及宗奴復自立征西將軍桓溫表國為鎮北將軍秦州刺史平羗校尉國子安為振威將軍武都太守十二年國從父楊俊復殺國自立安奔苻生俊遣使歸順升平三年以俊為平西將軍平羗校尉仇池公四年俊卒子世立復以為冠軍將軍平羗校尉武都太守仇池公海西公太和三年

遷征西將軍秦州刺史以世弟統為寧東將軍武都太守五年世卒統廢世子纂自立纂一名德聚黨殺統遣使詣簡文帝自陳復以纂為平羌校尉秦州刺史仇池公咸安元年苻堅遣楊安苻雅等討纂克之徙其民於關中空百頃之地纂後為楊安所殺宗奴之死也二子佛奴佛狗奔逃關中苻堅以佛奴為右將軍佛狗為撫夷護軍後以女妻佛奴子定以定為尚書領軍將軍孝武帝太元八年苻堅敗於淮南關中擾亂定盡力奉堅

堅死乃將家奔隴右徙治歷城城在西縣界去仇池百
二十里置倉儲於百頃招合夷晉得千餘家自號龍驤
將軍平羗校尉仇池公稱蕃於晉孝武帝孝武帝即以
其自號假之求割天水之西縣武都之上祿為仇池郡
見許十五年又以定為輔國將軍秦州刺史定已自署
征西將軍又進持節都督隴右諸軍事輔國大將軍開
府儀同三司校尉刺史如故其年進平天水略陽郡遂
有秦州之地自號西王至十九年攻隴西虜乞佛乾歸

定軍敗見殺無子佛狗子盛先爲監國守仇池襲位自號使持節征西將軍秦州刺史平羌校尉仇池公謚定爲武王分諸四山氏羌爲二十部護軍各爲鎮戍不置郡縣安帝隆安三年遣使稱蕃奉獻方物安帝以盛爲輔國將軍平羌校尉仇池公元興三年桓玄輔晉進盛平北將軍涼州刺史西戎校尉義熙元年姚興伐盛盛懼遣子難當爲質興遣將王敏攻城因梁州別駕呂瑩求救於盛盛遣軍次湍口敏退以盛爲都督隴右諸軍

事征西大將軍開府儀同三司時益州刺史毛璩討桓
玄所置梁州刺史桓希敗走漢中空虛盛遣兄子平南
將軍撫守漢中三年又假盛使持節北秦州刺史盛又
遣將苻寧行梁州刺史代撫九年梁州刺史索邈鎮南
城寧乃還高祖踐阼進盛車騎大將軍加侍中永初三
年改封武都王以長子玄為武都王世子加號前將軍
難當為冠軍將軍撫為安南將軍盛嗣位三十年太祖
元嘉二年六月卒時年六十二私謚曰惠文王玄字黃

眉自號使持節都督隴右諸軍事征西大將軍開府儀
同三司平羗校尉秦州刺史武都王雖爲蕃臣猶奉義
熙之號善待士爲流舊所懷安南將軍撫有文武智略
玄不能容三年因其子殺人并誅之文帝即以玄爲使
持節征西將軍平羗校尉北秦州刺史武都王乃改義
熙之號奉元嘉正朔初盛謂玄曰吾年已老當爲晉臣
汝善事宋帝故玄奉焉追贈盛驃騎大將軍餘如故六
年六月玄卒私謚曰孝昭王弟難當廢玄子保宗一名

羌奴而自立號使持節都督雍涼諸軍事秦州刺史平
羌校尉武都王太祖以為冠軍將軍秦州刺史武都王
九年進號征西將軍加持節都督校尉之號難當拜保
宗為鎮南將軍鎮宕昌以次子順為鎮東將軍秦州刺
史守上邽保宗謀襲難當事泄收繫之先是四方流民
有許穆之郝恢之二人投難當竝改姓為司馬穆之自
云名飛龍恢之自云名康之云是晉室近戚康之尋為
人所殺十年難當以益州刺史劉道濟失蜀土人情以

兵力資飛龍使入蜀為寇道濟擊斬之時梁州刺史甄
法護刑法不理太祖遣刺史蕭思話代任難當因思話
未至法護將軍下舉兵襲梁州破白馬獲晉昌太守張
範法護遣參軍魯安期沈法慧等拒之竝各奔退難當
又遣建忠將軍趙進攻葭萌獲晉壽太守范延朗其年
十一月法護委鎮奔洋川難當遂有漢中之地以氐苻
粟持為梁州刺史又以其凶悍殺之以司馬趙溫代為
梁州十年正月思話使司馬蕭諱先驅進討所向剋捷

遂平梁州事在思話傳四月難當遣使奉表謝罪曰臣聞生成之德含氣同係而榮悴殊途遭遇異兆至於恩降自然誠無答謝夫以狂聖道隔猶存克念之誠况君親莫二不期自感者哉每思自竭奉遵光訓丹誠未諒大謗已臻梁州刺史甄法護誣臣遣司馬飛龍擾亂西蜀諸所譖引言非一事長塗萬里無路自明風塵之聲日有滋甚與其逆生寧就清滅文武同憤制不自由遣叅軍姚道賢齎書詣梁州刺史蕭思話尋續又遣詣臺

歸罪道賢至西城爲守兵所殺行李蔽擁日月莫照法
護恒擾望風奔逃臣即回軍秋毫無犯權留少守以俟
會通其後數旬官軍尋至守兵單弱懼不自免續遣輕
兵共相迎接值秦流民懷土及本行將既旋不容禁制
由臣約防無素以致斯闕臣本歷代守蕃世荷殊寵王
化始基順天委命要名期義不在今日豈可假托妖妄
毀敗成功如此之形灼然易見仰恃聖明必垂鑒察但
臣微心不達迹違忠順至乃聲聞朝廷勞煩師旅負辱

之深罪當誅責遠隔遐荒告謝無地謹遣兼長史齊亮
聽命有司并奉送所授第十一符策伏待天旨太祖以
其遷裔下詔曰楊難當表如此悔謝前愆可特恕宥并
特還章節十二年難當釋保宗遣鎮童亭保宗奔索虜
主拓跋燾以爲都督隴西諸軍事征西大將軍開府儀
同三司平羌校尉南秦王遣襲上邽難當子順失守退
以爲雍州刺史守下辯十三年三月難當自立爲大秦
王號年曰建義立妻爲王后世子爲太子置百官具擬

天朝然猶奉朝廷貢獻不絕十七年其國大旱多灾異
降大秦王復為武都王十八年十月傾國南寇規有蜀
土慮漢中軍出遣建忠將軍苻冲出東洛以防之梁州
刺史劉道真擊斬冲十一月難當剋葭萌獲晉壽太守
申坦遂圍涪城巴西太守劉道銀嬰城固守難當攻之
十餘日不剋乃還十九年正月太祖遣龍驤將軍裴方
明太子左積弩將軍劉康祖後軍參軍梁坦甲士三千
人又發荊雍二州兵討難當受劉道真節度五月方明

等至漢中長驅而進道真到武興攻僞建忠將軍苻隆
剋之安西參軍韋俊建武將軍姜道盛別向下辯道真
又遣司馬夏侯穆季西取白水難當子雍州刺史順建
忠將軍楊亮拒之竝望風奔走閏月方明至蘭臯難當
鎮北將軍苻義德建節將軍苻弘祖萬餘人列陣拒戰
方明擊破之斬弘祖殺二千餘人義德遁去天水任愈
之率部曲歸順難當世子撫軍大將軍和據修城方明
又遣軍率愈之攻和大破之於是難當將妻子奔索虜

死于虜中安西叅軍魯尚期追難當出塞峽生禽建節

將軍楊保熾安昌侯楊虎頭初難當遣第二子虎為鎮
南將軍益州刺史守陰平聞父走逃還至下辯方明使
子肅之要之生禽虎傳送京師斬于建康市仇池平以
輔國司馬胡崇之為龍驤將軍秦州刺史平羗校尉守
仇池索虜拓跋燾遣安西大將軍吐奚弼平北將軍拓
跋齊等二萬人邀崇之二十年二月崇之至濁水去仇
池八十里遇齊等戰敗沒餘衆奔還漢中三月前鎮東

司馬苻達征西從事中郎任肅等舉義立保宗弟文德
爲主拓跋齊聞兵起遁走達追擊斬齊因據白崖分平
諸戍文德自號使持節都督秦河涼三州諸軍事征西
大將軍秦河涼三州牧平羌校尉仇池公遣露板馳告
朝廷太祖詔曰近者校尉仇池公表虜縱逸寇竊仇池
將士挫傷民萌塗炭眷言西顧矜慨在懷楊文德世篤
忠順誠感家國糾率義徒奄殄凶醜鋒旗所向殲潰無
遺氛稷澄清蕃境寧一念功惟事良有欣嘉便可遣使

慰勞宣示朝旨并敕梁州刺史申坦隨宜應援又詔曰

顯錄勲効益惟國典施賞務速無或踰時楊文德志氣
果到文武兼全乘機潛奮殊功仍集告捷歸誠獻俘萬
里朝無斲土樹難自肅休烈昭著朕甚嘉焉楊氏世祖
西勞方忠累葉宜紹先緒膺受寵榮可使持節散騎常
侍都督北秦雍二州諸軍事征西大將軍平羌校尉北
秦州刺史封武都王任肅祖父岐伯父祚父綜竝仕楊
氏為諮議從事中郎肅有志幹文德以為左司馬文德

既受朝命進戍茄蘆城二十五年為索虜所攻奔于漢
中時世祖鎮襄陽執文德歸之于京師以失守免官削
爵土二十七年王師北討起文德為輔國將軍率軍自
漢中西入搖動汧隴文德宗人楊高率陰平平武羣氏
據唐魯橋以拒文德文德水陸俱攻大破之衆竝奔散
高遁走奔羗文德追之至黎印嶺高單身投羗仇阿弱
家追斬之陰平平武悉平又遣文德伐啖提氏不剋梁
州刺史劉秀之執送荊州使文德從祖兄頭戍茄蘆荆

州刺史南郡王義宣反文德不同見殺世祖追贈征虜將軍秦州刺史孝建二年以保宗子元和為征虜將軍以頭為輔國將軍元和繼楊氏正統羣氏欲相宗推年小才弱不能綏御所部頭母妻子弟竝為索虜所執頭至誠奉順無所顧懷朝廷既不正元和號位部落未有定主雍州刺史王謨上表曰被勅令臣遣使與楊元和杨頭相聞并致信餉即遣中軍行參軍呂智宗齎書并信等亦自遣使隨智宗及頭語智宗頃破家為國母妻

子弟并墜沒虜中不顧孝道陳力邊捍竭忠盡誠未為
朝廷所識若以元和承統宜授王爵若以其年小未堪
大任則應別有所委頃來公私紛紜華戎交構皆此之
由臣伏尋頭元嘉以來寔有忠誠於國棄親遺愛誠在
可嘉氏羌負遠又與虜咫尺急之則反緩之則怨觀頭
使人言語不敢便望仇池公所希政在西秦州假節而
已如臣愚見蕃捍漢川使無慮患頭實有力四千戶荒
州殆不足吝元和小弱若未可專委復數年之後必堪

嗣業用之不難若才用不稱則應歸頭若茹蘆不守漢
川亦無立理上不許其後立元和為武都王治白水不
能自立復走奔索虜元和從弟僧嗣復自立還戍茹蘆
以為寧朔將軍仇池太守太宗太始二年詔曰僧嗣遠
守西疆世篤忠款宜加旌顯以甄義槩可冠軍將軍北
秦州刺史武都王太守如故三年加持節都督北秦雍
二州諸軍事進號征西將軍校尉刺史如故僧嗣卒從
弟文度復自立秦豫元年以為龍驤將軍略陽太守封

武都王又改龍驤為寧朔將軍後廢帝元徽四年加督

北秦州諸軍事平羌校尉北秦州刺史將軍如故文度

遣弟龍驤將軍文弘伐仇池破戍兵於蘭臯順帝昇明

元年詔曰茂賞有章實昭國度疇庸斯炳載宣史冊督

北秦州諸軍事寧朔將軍平羌校尉北秦州刺史武都

王文度門乘輝寵世榮邊邑忠果既亮才勁兼彰龍驤

將軍楊文弘肅協成規躬提桴鼓申稜百頃席卷蘭臯

功烈之美並足嘉歎宜膺爵授以酬勲緒文度可使持

節都督北秦雍二州諸軍事征西將軍刺史校尉悉如
故文弘輔國將軍略陽太守其年虜破茹蘆文度見殺
追贈本官加散騎常侍以文弘督北秦州諸軍事平羌
校尉北秦州刺史襲封武都王將軍如故退治武興

大且渠蒙遜張掖臨松盧水胡人也匈奴有左且渠右
且渠之官蒙遜之先爲此職羌之酋豪曰大故且渠以
位爲氏而以大冠之世居盧水爲酋豪蒙遜高祖暉仲
歸曾祖遮皆雄健有勇名祖祁復延封狄地王父法弘

襲爵苻氏以為中田護軍蒙遜代父領部曲有勇略多計數為諸胡所推服呂光自王於涼州使蒙遜自領營人配箱直又以蒙遜叔父羅仇為西平太守安帝隆安三年春呂光遣子鎮東將軍纂率羅仇伐枹罕虜乞佛乾歸為乾歸所敗光委罪羅仇殺之四月蒙遜求還葬羅仇因聚萬餘人叛光殺臨松護軍屯金山五月光揮纂擊破蒙遜將六七十人逃山中家戶悉亡散時蒙遜兄男成將兵西守晉昌聞蒙遜反引軍還殺酒泉太守疊

滕推建康太守段業為主業自號龍驤大將軍涼州牧
建康公以男成爲輔國將軍男成及晉昌太守王德圍
張掖剋之業因據張掖蒙遜率部曲投業業以蒙遜爲
鎮西將軍臨池太守王德爲酒泉太守尋又以蒙遜領
張掖太守三年四月業使蒙遜將萬人攻光弟子純於
西郡經旬不剋乃引水灌城窘急乞降執之以歸時王
德叛業自稱河州刺史業使蒙遜西討德焚城將部曲
走投晉昌太守唐瑤蒙遜追德至沙頭大破之虜其妻

子部落而還轉西安太守將軍如故四年五月蒙遜與男成謀殺業男成不許蒙遜反譖男成於業業殺男成蒙遜乃謂其部曲曰段公無道枉殺輔國吾為輔國報讎遂舉兵攻張掖殺段業自稱車騎大將軍建號永安元年是月敦煌太守李嵩亦起兵自號冠軍大將軍西胡校尉沙州刺史太守如故稱庚子元年與蒙遜相抗其冬嵩遣唐瑤及鷹揚將軍宗繇攻酒泉獲太守大且渠益生蒙遜從叔也呂光死子纂立元年為從弟隆所

纂姚興攻涼州隆稱臣請降蒙遜亦遣使詣興以為
鎮西將軍沙州刺史西海侯二年二月蒙遜與西平虜
秃髮傉檀共攻涼州為隆所破十月傉檀復攻隆三年
三月隆以蒙遜傉檀交逼遣弟超詣姚興求迎七月興
遣將齊難迎隆隆說難伐蒙遜蒙遜懼遣弟為質獻寶
貨於難乃止以武衛將軍王尚行涼州刺史而還義熙
元年正月李嵩改稱大將軍大都督涼州牧護羌校尉
涼公五月移據酒泉姚興假傉檀涼州刺史代王尚屯

姑臧二年九月蒙遜襲李嵩至安彌去城六十里嵩乃覺引軍出戰大敗退還閉城自守蒙遜亦歸六年蒙遜攻破傳檀傳檀走屯樂都武威人焦朗入姑臧自號驃騎大將軍臣于李嵩八年蒙遜攻焦朗殺之據姑臧自號大都督大將軍河西王改稱玄始元年立子正德為世子十三年五月李嵩死子歆立六月歆伐蒙遜至建康蒙遜拒之歆退走追到西支間蒙遜大敗死者四千餘人乃收餘衆增築建康城置兵戍而還十四年蒙遜

遣使詣晉奉表稱藩以蒙遜為涼州刺史高祖踐阼以
歆為使持節都督高昌敦煌晉昌酒泉西海玉門堪泉
七郡諸軍事護羌校尉征西大將軍酒泉公永初元年
七月蒙遜東略浩疊李歆乘虛攻張掖蒙遜回軍西歸
歆退走追至臨澤斬歆兄弟三人進攻酒泉剋之歆弟
敦煌太守恂據郡自稱大將軍十月蒙遜遣世子正德
攻恂不下三年正月蒙遜自往築長堤引水灌城數十
日又不下三月恂武衛將軍宗丞廣武將軍弘舉城降

恂自殺李氏由是遂亡於是鄯善王比龍入朝西域三十六國皆稱臣貢獻高祖以蒙遜為使持節散騎常侍都督涼州諸軍事鎮軍大將軍開府儀同三司涼州刺史張掖公十二月晉昌太守唐契反復遣正德攻契景平元年三月克之契奔伊吾八月芮芮來抄蒙遜遣正德拒之正德輕騎進戰軍敗見殺乃以次子興國為世子是歲進蒙遜侍中都督涼秦河沙四州諸軍事驃騎大將軍領護匈奴中郎將西夷校尉涼州牧河西王開

府持節如故太祖元嘉元年枹罕虜乞佛熾槃出貂渠
谷攻河西白草嶺臨松郡皆沒執蒙遜從弟成都從子
日蹄頗羅等而去三年改驃騎為車騎世子興國遣使
奉表請周易及子集諸書太祖竝賜之合四百七十五
卷蒙遜又就司徒王宏求搜神記弘寫與之六年蒙遜
征枹罕時乞佛熾槃死矣子茂蔓大破蒙遜生擒興國
殺三千餘人蒙遜贖興國送穀三十萬斛竟不遣蒙遜
乃立興國母弟菩提為世子朝廷未知也七年以興國

為冠軍將軍河西王世子其年夏四月西虜赫連定為
索虜拓跋燾所破奔上邽十一月茂蔓聞定敗將家戶
及興國東征欲移居上邽八年正月至南安定率眾禦
茂蔓大破之殺茂蔓執興國而還四月定避拓跋燾欲
渡河西擊蒙遜五月率部曲至治城峽口渡河濟未半
為吐谷渾慕瓚所邀見獲興國被創數日死九年以菩
提為冠軍將軍河西王世子十年四月蒙遜卒時年六
十六私諡曰武宣王菩提年幼蒙遜第三子茂虔時為

酒泉太守衆議推茂虔為主襲蒙遜為號十一年茂虔
上表曰臣聞功以濟物為高非竹帛無以述德名以當
實為美非謚號無以休終先臣蒙遜西復涼城澤愴崑
裔芟夷羣暴清灑區夏暨運鍾有道備大宋之宗臣爵
班九服享惟永之丕祚功名昭著剋固貞節考終由正
而請名之路無階懿跡雖弘而述叙之美有缺臣子痛
感咸用不安謹案謚法剋定禍亂曰武善聞周達曰宣
先臣廓清河外勲光天府標榜稱迹實兼斯義輒上謚

為武宣王若允天聽垂之史筆則幽顯荷榮始終無恨
詔曰使持節侍中都督秦河沙涼四州諸軍事車騎大
將軍開府儀同三司領護匈奴中郎將西夷校尉涼州
牧河西王蒙遜才兼文武勲濟西服爰自萬里款誠夙
著方仗忠果翼宣遠略奄至薨隕悽悼于懷便遣使弔
祭并加顯謚嗣子茂虔纂戎前軌乃心彌彰宜蒙寵授
紹茲蕃業可持節散騎常侍都督涼秦河沙四州諸軍
事征西大將軍領護匈奴中郎將西夷校尉涼州刺史

河西王河西人趙旼善歷筭十四年茂虔奉表獻方物

并獻周生子十三卷時務論十二卷三國總略二十卷

俗問十一卷十三州志十卷文檢六卷四科傳四卷燉

煌實錄十卷涼書十卷漢皇德傳二十五卷王典七卷

魏駁九卷謝艾集八卷古今字二卷乘邱先生三卷周

髀一卷皇帝王歷三合紀一卷趙旼傳并甲寅元歷一

卷孔子讚一卷合一百五十四卷茂虔又求晉趙起居

注諸雜書數十件太祖賜之十六年閏八月拓跋燾攻

涼州茂虔兄子萬年為虜內應茂虔見執茂虔弟安彌
縣侯無諱先為征西將軍沙州刺史都督建康以西諸
軍事酒泉太守第六弟武興縣侯儀德為征東將軍秦
州刺史都督丹領以西諸軍事張掖太守燾既獲茂虔
遣軍擊儀德棄城奔無諱於是無諱儀德擁家戶西就
從弟燉煌太守唐兒燾使將守武威酒泉張掖而還十
七年正月無諱使唐兒守燉煌自與儀德伐酒泉三月
剋之攻張掖臨松得四萬餘戶還據酒泉十八年五月

唐兒反無諱留從弟天周守酒泉復與儀德討唐兒唐
兒將萬餘人出戰大敗執唐兒殺之復據燉煌七月拓
跋燾遣軍圍酒泉十月城中饑萬餘口皆餓死天周殺
妻以食戰士食盡城乃陷執天周至平城殺之于時虜
兵甚盛無諱衆饑懼不自立欲引衆西行十一月遣弟
安周五千人伐鄯善堅守不下十九年四月無諱自率
萬餘家棄燉煌西就安周末至而鄯善王比龍將四千
餘家走因據鄯善初唐契自晉昌奔伊吾是年攻高昌

高昌城主闕爽告急八月無諱留從子豐周守鄯善自將家戶赴之未至而芮芮遣軍救高昌殺唐契部曲奔無諱九月無諱遣將衛奈夜襲高昌爽奔芮芮無諱復據高昌遣常侍汜儁奉表使京師獻方物太祖詔曰往年狡虜縱逸侵害涼土西河王茂虔遂至不守淪陷寇逆累世著誠以為矜悼次第無諱克紹遺業保據方隅外結鄰國內輯民庶係心闕庭踐修貢職宜加朝命以褒篤勲可持節散騎常侍都督涼河沙三州諸軍事征

西大將軍領護匈奴中郎將西夷校尉涼州刺史河西
王無諱卒弟安周立二十一年詔曰故征西大將軍河
西王無諱弟安周才略沈到世篤忠款統承遺業民衆
歸懷雖亡士喪師孤立異所而能招率殘寡攘寇自今
宜加榮授垂軌先烈可使持節散騎常侍都督涼河沙
三州諸軍事領西域戊巳校尉涼州刺史河西王世祖
大明三年安周奉獻方物

史臣曰氏籍世業之資胡因崛起之衆結根百頃跨有

河西雖戎夷猾夏自擅荒服而才力雄富頗尚禮文楊

氏兵精地險境接華漢向隙邊關首鼠疆場遂西入白

馬東出黃金乘晉壽之捷構圍涪之豐規吞黑水志傾

井絡紀郢之勢方危樊鄧之心屢駭天子聽朝不怡有

懷辛李之將而齊之宣皇率偏旅數百定命先驅推鋒

直指勢踰風電雲徹席卷致屆南城逐北追奔全勝萬

里敵人皆裹骨輿屍越至險而自竄其餘皆膏身山野

委骸川澤既而裴劉二將藉其威聲故使濁水靡旗蘭

畢失險氏族轉徙奔亡遺燼不滅者若線梁土獲乂以迄于今由此而言功烈可謂盛矣

宋書卷九十八

宋書卷九十八考證

氏胡傳關中士奔流者多依之○中字下一本有人字
十二年難當釋保宗遣鎮童亭○後魏書作薰亭水經
注作董亭

楊氏世祖西勞方忠累葉○勞字當在忠字下

宋書卷九十八考證